

Hiep Hiep Hoera pa Kondom?

AIDS atrobe tabata un trastorno teribel rònt mundu den último año. Ta kalkulá ku tin 2 mion asiátiko infektá pa e viro, i pa año 2000 e sifra ei lo yega na mas ku 10 mion. India ta e pais di Asia ku mas portadó, 1 mion, i Tailandia tin 500.000. Vietnam tin 1431 seropositivo ofisialmente deklará, ma mas òf ménos 300.000 vietnames lo por resultá afektá pa AIDS pa fin di e dékada.

Minister di salubridat di Zimbabwe a deklará ku 90% di mortonan na su nashon ta relashoná ku e viro aki. Nan ta pronostiká ku pa año 2000 lo tin 500.000 huerfano komo resultado di AIDS na Zimbabwe.

Latinonan tambe ta sufri. Guatemala a reportá 1232 kaso di AIDS komprobá, di kua 187 a muri, i ta pronostiká ku e portadónan por yega na 35.000. Na Colombia tin 8.527 hende infektá i ta kalkulá ku e sifra ei lo subi pa 50.000 portadó. Puerto Rico a detektá 11.825 kaso di AIDS na e isla aki. Na Brazil, 18.000 di e 45.859 kasonan di AIDS registrá di 1980 pa 1992, ya kaba a muri.

E Oraganisashon di Salù Mundial ta kalkulá ku mundialmente, pèrdida ekonomiko dirèkt òf indirèkt di e plaga aki lo yega na \$350 bion.

Un año pasá, nos a ser informá ku na Antia tin ta entre 1500 pa 2000 hende afektá, i ku gobièrnu ta paga alrededor di 50 mil florin pa año na gastunan médiko pa kada pashènt ku AIDS. Resientemente, un miembro di e komishon di AID a revelá ku tin basta hende na nos isla ku ta inkonsiente ku nan ta portadó. Ta klaro ku AIDS ta un tragedia teribel ku ta pinta di bira un katastrofe. E no solamente ta mata su víktima, ma tambe lo bira un peso ekonómiko astronómi

Tin un solushon! Ma tristu ta ku poko pais ta dispuesto pa asept'é. Paisnan ta hogando, mientras nan gobernantenan, nan komishonnan di AIDS, nan ekspertonan ta keda tene na un salbadida di latèks, keriendo ku e kondom milagrosoamente lo reskatá nan. Año tras año, nan ta toka e mésun kansion, manera un disko ku a pega, sin paga tinu ku año tras año miles di hende ku a balia riba nan piesa a muri PASOBRA nan a sigui e konseha di e "ekspertonan."

E mensahe ku nos ta haña na nos islanan ta esun di e "ekspertonan." Poku siman pasá, un miembro di e komishon di AIDS na nos isla a deklará: "Nos mester realisá ku na e momentu aki, e úniko medida pa evitá ku bo ta pega ku AIDS ta uso di kondom, tantu pa hende hòmber komo hende muhé." Nos tin apresio pa e komishon di AIDS. Ma nan ta bai tras di e mentira ku kondom ta e solushon.

KONDOM NO TA E SOLUSHON! No tin espasio aki pa bolbe duna evidencia i sífranan di fuentenan konfiabel ku ta dokumentá bon kla ku nos ta gaña nos mes pa kere ku kondom ta garantisá protekshon kontra enfermedatnan venérikos. Evidensia ta indiká ku un pèrsona infektá tin 1/6 (i kisas 1/3) chèns pa kontagiá su partner seksual ku un enfermedat venérikos **MIENTRAS NAN TA HASI USO DI KONDOM.**

E promoshon di kondom ta duna un sintimentu di siguridat falsu ku hende por gosa bai gol! Pues, e uso di **KONDOM TA ENKURASHA MAS AKTIVIDAT SEKSUAL**, ku e resultado ku **MAS** hende ta keda eksponé na e viro HIV.

Kiku ta e solushon? Moralidat! 1) No tene relashon seksual ku ningun pèrsona promé ku bo kasa. 2) Kasa ku un pèrsona no infektá, i tene relashon seksual ku n'é so. 3) Si ya kaba bo a yega di kometé un akto immoral, stop inmediatamente i keda puru te matrimonio anto keda fiel na bo kasá despues di kasa.

Beibel ta bisa: "No kometé adulterio...Apstené boso di fornikashon" (Exodo 20:14; 1 Tesalonisensenan 4:3). Nos Kreadó no a duna nos reglanan tokante kondukta seksual pasobra E no ke pa nos gosa den bida. Alkontrario, obediensia ta hasié pusibel pa gosa bida...bo salú i asta bo bida por dependé di bo obediensia na loke Dios a bisa miles di año pasá.

Moralidat, un plan simpel, un plan ku no ta kosta gobièrnu ni un sèn, un plan ku ta sumamente efektiv! Tardi òf tempran nos lo mester aseptá e plan aki--si nos ke si òf nò! E úniko pregunta ta kuantu di nos yunan ku a usa kondom lo nos mester dera promé ku nos ta spierta fo'i soño i realisá ku moralidat ta úniko solushon pa AIDS?